

खास-खास खबरां:-

1. प्रधानमंत्री नरेन्द्र मोदी होरें गलाया जे पच्छिम एशिया प्रति भारत दा नजरिया एहदी ताकत ते निर्णायक कारवाई गी उजागर करदा ऐ।
2. विदेशमंत्री डाक्टर एस. जयशंकर होरें अमरीकी विदेश मंत्री- मंत्री Marco Rubio हुंदे कन्नै ऊर्जा सुरक्षा सरबंधी चैंताएं उप्पर चर्चा कीती।
3. असम- केरल ते पुद्दुचेरी विधानसभा चुनाएं लेई नामांकन-पत्रें दी जांच अज्ज होगा।
4. चुनां आयोग नै पच्छिम बंगाल च SIR फैसले मगरा पहली पूरक मतदाता सूची जारी कीती ऐ।
5. दक्खन पच्छमी कोलम्बिया च 125 लोकें गी लेइयै जा' रदा इक ज्हाज दुर्घटना ग्रस्त होई गया ऐ। घट्ट शा घट्ट 77 लोकें गी जिंदा बचाई लैता गेआ ऐ।
6. दंऊ-रोजा राष्ट्रीय इंडोर एथलेटिक्स प्रतियोगिता अज्ज थमां शुरु - एहदे च 278 खडारी हिस्सा लैगंन।



PM -West

प्रधानमंत्री नरेन्द्र मोदी होरें गलाया ऐ जे पच्छिम एशिया च जारी तनाऽ बश्कार भारत दे नजरिये ने आपसी सरबंध बनाने- निर्णायक आहली परिस्थितियें दा कारगर तरीके कन्नै प्रबंधन करने दी देश दी मजबूत क्षमता गी उजागर कीता ऐ। नमीं दिल्ली च जंदी संजा इक नीजि मीडिया समूह दी तरफा आयोजित शिखर सम्मेलन गी सम्बोधित करदे होई प्रधानमंत्री होरें गलाया जे 28 फरवरी शा विश्व च चला रदी यक्को-तक्की दे बावजूद भारत आत्म-विश्वास ते विकास दी अपनी प्रतिबद्धता कन्नै अगगे बधा'रदा ऐ। मोदी होरें इस गल्ला उप्पर बल दिता जे देश कुसा बी चुनौती शा पिच्छे नैई हटा'रदा- सगुआं डटीयै ओहदा मुकाबला करा'रदा ऐ। प्रधानमंत्री होरें गलाया जे युद्ध जनेह मुश्कल परिस्थितियें च विश्व ने भारत दी नीतियें- रणनीतिक सोच ते क्षमताएं गी पंछानेआ ऐ। प्रधानमंत्री होरें गलाया जे भारत खाड़ी मुख्वां शा लेइयै ग्लोबल वैस्ट- ग्लोबल साउथ ते अपने गोआंडी मुख्वां तगर सब्बनें लेई बसाऽ- भरोचे आहले सांझेदार दे रुप च उभरेया ऐ।



Jaishankar

विदेशमंत्री डाक्टर एस. जयशंकर होरें कल अमरीका दे विदेश मंत्री Marco Rubio उं'दे कन्नै टेलीफोन पर गल्लबात कीती। उ'नें सोशल मीडिया पोस्ट च दस्सेया ऐ उं'दी गल्लबात पच्छिम एशिया संघर्ष ते अंतराष्ट्रीय अर्थ-बवस्था उप्पर एहदे प्रभाव उप्पर केन्द्रत ही। डाक्टर जयशंकर होरें दस्सेआ जे उ'नें ऊर्जा सुरक्षा सरबंधी चैंताएं उप्पर बी विचार-विमर्श कीता। विदेश मंत्री होरें कल सऊदी अरब ते संयुक्त अरब अमीरात सनें खाड़ी सहयोग परिषद दे सदस्य मुख्वां कन्नै बी मुलाकात कीती। एहदे शा पैहले विदेशमंत्री होरें श्रीलंका दे विदेश मंत्री विजिथा हेरथ हुंदे कन्नै गल्लबात कीती ते पच्छिम एशिया संघर्ष दे नतीजें उप्पर चर्चा कीती। उ'नें गलाया भारत "गोआंडी पैहले" ते विजन महासागर प्रति प्रतिबद्ध ऐ।



Scrutiny Nomiation Papers

असम-केरल ते पुद्दुचेरी विधानसभा चुनाएं दे नामांकन पत्रें दी जांच अज्ज होगा। नामांकन-पत्र दाखल करने दी अखीरी तरीक कल ही। मेदवारी वापस लैने दी अखीरी तरीक वीरवारें ऐ। इनें दंऊ राज्यें ते केन्द्र शासत प्रदेश च इक गेड़ च मतदान अगले मीहने दी 9 गी तरीक होग ते वोटें दी गिनतरी 4 मई गी होगा।



Keralam –Nomination

केरलम च विधानसभा चुनां लेई नामांकन पत्रें दी अज्ज जांच कीती जाग। इस दौरान नामांकन प्रक्रिया कल खत्म होने मगरा राज्य च चुनां प्रचार तेज होई गेदा ऐ। 3 प्रमुख राजनीतिक मोर्चे दे नेताएं राज्यें दे बक्ख-बक्ख हिस्सें च प्रचार गतिविधियां तेज करी दितियां न। मुख्मन्त्री पिनाराई-विजयन- विपक्ष दे नेता वी.डी. सतीशन ते भातीय जनता पार्टी दे प्रदेश अध्यक्ष राजीव चन्द्र शेखर होर उनें प्रमुख नेताएं च शामिल न- जेडे चुनां प्रचार च हिस्सा लैगन। नामांकन पत्र वापस लैने दी अखीरी तरीक खत्म होने मगरा वीरवारें मेदवारें दी अखीरी सूची सामने आई जाग।



HP Vat Bill

हिमाचल प्रदेश विधान सभा नै प्रदेश मुल्य वर्धित कर विधेयक 2026 पास करी दिता ऐ। एहदे कन्नै राज्य सरकार गी पैट्रोल ते हाई-स्पीड डीजल उप्पर 5 रुपए फ्ही लीटर तगर दा उप-कर लाने दा अधिकार मिली गेआ ऐ। विपक्ष दे विरोध दे बावजूद बी एह विधेयक पास करी दिता गेआ।



WB-EC-SIR Supplementary List

चुनां आयोग नै जंदी रातीं पच्छिम बंगाल च SIR दे बारे च न्यायालय दे फैसले मगरा पहली पूरक मतदाता सूची जारी करी दिती ऐ। हर-इक बूथ लेई सूची चुनां आयोग दी वेबसाईट उप्पर रातीं तकरीबन 11 बजियै 55 मिनट उप्पर उपलब्ध कराई गेई। पूरक सूची च उनें मतदाताएं दे नांश शामिल हे- जिंदे मामलें दा फैसला सर्वोच्च न्यायालय दे निर्देश मगरा न्यायिक अधिकारियें कीता ऐ। मुख्म चुनां अधिकारी मनोज कुमार अग्रवाल होरें दस्सेआ जे अजे तगर तकरीबन 29 लक्ख नांशयें दे बारे च फैसला होई चुकेया ऐ। एहदे शा पैहले 28 फरवरी गी प्रकाशत अखीरी मतदाता सूची च तकरीबन 60 लक्ख नांशयें दी निर्णयाधीन दे रुप च निशानी लाई गेई ही।



ECI West Bengal

चुनां आयोग नै कल पच्छिम बंगाल दे जिला निर्वाचन ओहदेदारें- पुलस अधीक्षकें- पुलस आयुक्तें ते होरनें दुए अधिकारियें आस्तै ऑनलाईन समीक्षा ते प्रशिक्षण सत्र दा आयोजन कीता। आयोग दे वरिष्ठ अधिकारियें राज्य च हिंसा- डर-त्राह ते प्रलोभन सोयां मुक्त चुनां यकीनी करने आस्तै जिला प्रशासन ते कनून ते बवस्था तंत्र दी तयारियें दी समीक्षा कीती। बैठक दौरान मतदाताएं च जागरुकता बढ़ाने ते सारे मतदान केन्द्रें च लोडचदियां स्थूलतां उपलब्ध करीआने दा भरोसा दोआया।



Colombia Military Plane

दक्खन पच्छिम कोलम्बिया च डोआरी भरदे किश गै चिरे परैन्त 125 लोकें गी लेइयै जा'रदा इक सैन्य परिवहन जहाज दुर्घटनाग्रस्त होई गया। एहदे च जान-माल दे नुक्सान दा अजे कोई पता नैई चलेआ। ऊआं घट्ट शा घट्ट 77 लोके गी जिंदा बचाई लैता गेआ ऐ। रक्षा मंत्री पैड्रो सांचेज़ होरें सोशल मीडिया उप्पर इक पोस्ट च दस्सेआ जे पेरु ते इक्वाडोर दे बन्ने उप्पर स्थित Amazon प्रांत दे प्रदुमायो च एह हादसा होआ। इस जहाज च सैनिक सवार हे। कोलम्बिया वायु सेना दे कमांडर होरें इक विडियो च दस्सेआ जे हरक्यूलिस सी-130 जहाज च 114 यात्री ते 11 चालक दल दे सदस्यें सनें 125 लोक सवार हे।



Air Canada Crash

न्यूयार्क दे लागार्डिया हवाई अड्डे दे रनवे पर होए दे विमान हादसे च 2 पायलटें दी मौत होई गई ते केई सारे घाउल होए ना। हादसे दे मगरा एयर कनाडा दे CEO माइकल रूसो होरें हैल्पलाईन ते विशेष सहायता दल दी घोषणा कीती। हादसे मगरा आपातकालीन कार्रवाई शुरु होई। विमान च सोआर 76 चां 41 गी अस्पताल च भर्ती करोआया गेआ। रूसो होरें आखेआ जे एयर लाईन प्रभावित लोकें दी मदद पर ध्यान केन्द्रीत करने दे कन्नो-कन्नी जांच-कर्ताएं गी बी सहयोग करा'रदी ऐ।



NIA- Searches

राश्ट्रीय जांच एजेंसी NIA नै जम्मू-कश्मीर दी केई सारी थाहरें पर छापेमारी कीती। एह छापेमारी दिल्ली लाल किले कश होए दे धमाके आहले मामले च कीती गई। एह छापेमारी जम्मू- श्रीनगर- बारामुला- कुलगाम- गांधरबल ते हंदवाड़ा जिले दी 9 थाहरें पर होई। तपाशी दौरान केई सारे डिजिटल उपकरण जांच लेई जवत कीते गए। एजेंसी दा आखना ऐ जे इस मामले च अजे तगर 11 आरोपियें गी गिरफ्तार कीता गेआ ऐ। जांच दौरान पता लग्गा जे उमर उन नबी जेड़ा धमाके च मारेआ गेआ हा ओह मुख्ब साजिशकर्ता हा ते एदे च हिरासत च लैते गेदे ते होर दुएं ओदी मदद- कारवाई गी अंजाम दोआने च कीती। एजेंसी नै आखेआ ऐ जे बड्डी साजिश दा पता लाने लेई जत्त कीते जा'रदे ना।



Athletics Championships

भुवनेश्वर दे कलिंगा स्टेडियम च अज्ज पैहली राश्ट्रीय इंडोर एथलीटिक्स प्रतियोगिता शुरु होग। एहदे कन्नै गै देश च ट्रैक ते फील्ड प्रतियोगिताएं दे क्षेत्र च नमें अध्याय दी शुरुआत होग। दंऊ दिन दी इस प्रतियोगिता च 97 महिला एथलीटें सनें 278 खडारी हिस्सा लै'रदे ना। आयोजके मुजब एह प्रतियोगिता भारत च इंडोर एथलेटिक्स गी सशक्त बनाने लेई विकसित कीती गई दी ऐ।

